

# **Abans, pendent e arron las eleccions... La luta, la solidaritat e l'imaginacion que deven contunhar !**

Quin que sia la sòrta de las eleccions qui arriban, dens las enterpresas, los barris e las campanhas, la mobilizacion que's deu perseguir.

## **La luta**

Contra la precarizacion de l'emplec, lo tribalh deus dias sabatèrs, la barradura d'enterpresas e la desindustrializacion... quan las chifras d'ahars deus principaus grops capitalistes n'an pas jamei hèit autant beneficis.

Contra las politics agricòlas, inspiradas peus gigants mondials com locals, qui vòlen har crebar paisanòts e n'acabar fin finau dab un agricultura de talha umana qui'ns dessenhè lo país despuish sègles.

Contra l'especulacion immobiliària, qui dens las vilas, e priva de lotjaments decents ua partida creishenta de la poblacion, e au campèstre, liura la tèrra aus ostaus segondaris e dessenha uei lotiments on la vita sociala n'ei pas prevista. Lotiments copats deus vilatges o de las vilòtas qui's veden la vita sociala arredusir.

Contra la deculturacion qui, a maugrat d'uns agís simbolicos tà l'occitan, contunha. L'importància de l'occitan e la cultura sancèra ligada que demoran denegadas per l'Estat francés. Qu'ei tà nosautres ua question de dignitat e d'egalitat entà'us tornar balhar la lor plaça en la societat nosta. E que son tanben dreus inalienables tà tots pòbles, com lo pòble occitan.

## **La solidaritat**

De cap a l'avançada creishenta de la penalizacion de tot e d'arren, deu contaròtle policièr de la poblacion e de la repression qui tòca cade movement reivindicatiu, la solidaritat que'ns demora la mei grana hòrça entà resistir.

Dab los qui son los mei tocats, los shens papèrs percaçats, los joens tiralhats e estigmatizats, los tribalhadors e los paisans en luta. Enter culturas, entà d'arrefusar lo racisme e la division, pr'amor qu'ei la condicion nosta d'espleitats e de discriminats qui ns'amassa.

Qu'ac tornam díser, AAP qu'ei internacionalista. Qu'arrefusam la guèrra enter los pòbles qui'n serveishen pas sonque qu'aus interès capitalistes e imperialistas. Entà d'aquò, de la medisha faïçon qui èm solidaris de tots los espleitats, ací, en Occitània, qu'arrefusam las guèrras miadas uei en Afganistan, en Irac, en Colombia o en Palestina. E pr'amor qu'èm internacionalistas, que seram tostemps solidaris d'aqueths pòbles aucupats, martirizats, e dab los movements progressistas qui participan a la luta acerà.

La solidaritat qu'ei la basa de las societats vertadèrament democraticas e egalitàrias, com ac ei entà cambiar lo rapòrt de hòrça en la luta enter los pòbles e los estats imperialistas, qui la França.

## **L'imaginacion**

Ne podem pas demorar sonque en los limits que ns'impausa aquesta republica entà lutar e bastir la societat que volem.

Que sia lo sistèma politic, lo descopatge territorial, l'arrepresentacion politica... tot aquò que'ns muishè los limits e ne respon pas a la volentat deus pòbles. De la medisha faïçon, l'accion sociala e politica que hè hrèita d'ideas navèras entà d'avançar, de s'encuentar de cap a l'experiéncia deus ancians qui conquesin los aquesits socials qui ns'an, uei, quasi tots estat tirats peus divèrs govèrns.

Que devem tornar botar en question lo poder de'us qui'ns disen arrepresentar, com disem aus sindicats de hà's l'autocritica. Mei d'ua decennia de luta entà salvar los aquesits socials ne s'i son pas escaduts despuish 1995. Los darrèrs movements victorios qu'estón lo frut d'organisations espontaneas d'ua partida de la poblacion. Brembam-nse deu movement dit « anti-CPE » ! De tira la joenessa qu'a despessat la reivindicacion contra aqueste navèth contracte precari e discriminatòri, entà portar perpausacions qui prefigurèn un cambiament de societat.

L'estudi de l'istòria nosta, las practicas democraticas e l'anticonformisme, que'ns deu har gahar l'ofensiva e n'acabar dab la posicion sonque des-hensiva de la majoritat deu movement social, mes tanben entà d'imaginar autas fòrmas de govèrns.

**Tà d'aquò, AAP que'vs convida a participar au noste seguici e darrèr la nosta banderòla, puish a juntar-nse sala Recabòrda, a 12h, barri deu Hedàs, entà d'un disnar popular e l'espier deu filme « The Take » tà l'arrecuperacion de las enterpresas en Argentina au moment de la crisi de 2001.**

**Un exemple au mei d'un hèish d'autas d'alternativa.**

## **Que seram çò que bastiram !**

contacts :

**Bordèu : [www.gasconha.nord@anaram.org](mailto:www.gasconha.nord@anaram.org)**

**Bearn e nacional : [info@anaram.org](mailto:info@anaram.org) - AAP 2 còsta de la Hont. 64000 Pau.**

**Lengadòc : [lengadoc@anaram.org](mailto:lengadoc@anaram.org)**

**[www.anaram.org](http://www.anaram.org)**

